

Carta Cha Sacuhun Ra Apóstol Pablo Chi Ñáyiví Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹ Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyí cuví apóstol chi ra, tacuhva vatyí sacote chi ñáyiví yoso caa sacacū Nyoo añima yo.

² Ihya cuví tuhun cha catyí Nyoo chi yo tyi cusacuvi ra, ta chicunyaḡ nu tutu tuhun ra tandihí cha tyaḡ ra profeta ta cha naha.

³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyí quichí ra siqui ñuhu ñáyiví chihin coño ñuhu ra tari coño ñuhu maa yo. Tata rey David cuví chi ra.

⁴ Ta Nyoo chihin Tatyí Ii ra sacotḡ cachi ra chi yo vatyí Sehe ra cuví chi ra, vatyí sanandotḡ ra chi ra chihin cha ndicha ñuhu ra.

⁵ Ta cha cuenda maa ra Jesucristo chaha Nyoo tumañi iñi chi nyuhu cha cahun ndi cucaca ndi tyiño ra, tacuhva nachino iñi ñáyiví chi ra nicahnu ñuhu ñáyiví, ta quichaha ñu chi ra.

⁶ Ta mahñu ñu cuan, ñohó tucu nyoho vatyí suri nacana tucu ra Jesucristo chi nyoho.

⁷ Sacuhín tutu ihya chi tandihí nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyí coo ndo noo ñáyiví cachi cha

sacahnu ndo chi ra. Na naquehen ndo cha vaha ta cha taxi ri cuñí añima ndo cha chahá Sutu yo Nyoo ta Sutu Mañi yo Jesucristo chi yo.

Nu catyí ra Pablo vatyi cuñí ra cuhun ra ñuu Roma

⁸ Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihí nyoho. Vatyi tandihí ri ityi cahán ñu tuhun vatyi chinó xaan iñi ndo chi ra Jesucristo.

⁹ Ta tyiño nuu Nyoo sacuví yuhu chihin cha tandihí añime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nichón iñi chi ndo cuhva cha chicán tahvi chi ra. Ta chicán tahvi cha cuenda ndo.

¹⁰ Chiquén chi Nyoo na cuvi cuhva cuñí ra, ta cuhin nu nyicú ndo, vatyi cha naha xaan cuñí cuhin.

¹¹ Vatyi cuñí tyinyei chi ndo, ta naquehen ndo cha vaha cha chahá Nyoo ta cuní ca iñi ndo.

¹² O cuñí chi catyí vatyi saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³ Yañi, cuñí tyi coto ndo vatyi cuaha xaan chaha cuñí cunyehe nu nyicú ndo, soco nya vityin ta ña chaha chi cuhva chii. Cuñí vatyi cuní ca iñi ndo tari nduní ca iñi ñu vehe ñuhu inga ñuu nu chahin. Vatyi tatu nduní iñi ndo, nduní tucu iñi yuhu.

¹⁴ Vatyi nyaá siqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñí iñi. Tahán chi cha cahin chihin tandihí ri ñu.

15 Yucuan chaha, cha cuenda yuhu, cuñí xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

16 Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandihí ñáyiví cha chinó ñni chi ra. Ta cha xihna ri chi ñu Israel. Ta cha cu uvi, ñu inga ñuu.

17 Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó ñni yo chi ra. Ta suri cha cuenda cha chinó ñni yo, coo yo ñáyiví chaa chihin ra. Tyehe caa nyaá nu tutu tuhun Nyoo: “Ñu cha nduvahá añañima saha Nyoo, coo ñu noo ñáyiví chaa chihin cha chinó ñni ñu chi ra.”

Tandihí ñáyiví ta iyó cuatyí ñu

18 Ta nyehé yo vatyí nya nu nyaá Nyoo nya andiví ta tachí tuñi ra chi ñáyiví quiñi iyó, ñáyiví ña vaha. Ta cha quiñi iyó ñu, ña chahá chí coto ñu cha ndicha.

19 Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chí ñu.

20 Vatyí vasi ña nyehé yo chí ra, cuví coto yo vatyí iyó ra vatyí nyehé yo tandihí cha savaha ra. Nyata chinqo ñuhu ñáyiví ta tandihí cha savaha ra ta sañahá chí chí yo vatyí maa ra cuví Nyoo, ta tunyee ñni cha iyó chí ra ma ndihí maa. Yucuan chaha ma cuví catyí ñáyiví tyi yori Nyoo iyó.

21 Ta vasi cha chító ñu tyi iyó noo Nyoo cahnu, soco ña sacahnú ñu chí ra tari cuhva tahán chí cha sacahnu yo chí ra. Ni ña nacuhva ñu tyahvi nyoo chí ra. Soco maa maa ri tuhun cha ñima ri

tuhun chicá xiñi ñu. Ta cha cuenda cha ndava
añima ñu, cutondō cha chiñi tuñi xiñi ñu ta ndoq
ñu nu ñaa iñi.

²² Vasi catyí ñu tyi chitó xaan ñu soco ñu tondo
cuví ñu.

²³ Vatyí cha nuu cha sacahnú ñu chi Nyoo ra
cahnu ca cuví, ra ña tuhva chihi; sacahnú ñu chi
xitohyo cha caá tari caá ñáyiví tuhva chihi. Ta
nyacua nya xitohyo cha tari caá saa, ta coo, ta
quití cha cumi tahan chaha, ta sacahnú ñu.

²⁴ Yucuan chaha saña ndaha ndihí Nyoo chi ñu
na sacuvi ñu tandihí cha quiñi caa cha quichí cuví
iñi ñu. Yucuan chaha maa maa ri tuhun cha
cahán nuu yo nyacuví ñu chihin tahan ñu.

²⁵ Vatyí ña chinó iñi ñu cha ndicha vaha Nyoo.
Vatyí noo cha ña ndicha, yucuan chinó iñi ñu. Ta
sacuvahá ca ñu, ta casacahnú ca ñu cha savaha
Nyoo ta ña cuñí ñu sacahnú ñu chi maa maa ra.
Vatyí chi maa ra tahán chi sacahnú yo tyicuan ri
maa. Ta na cuví chi tyicuan caa.

²⁶ Yucuan chaha saña ndaha Nyoo chi ñu na
sacuvi ca ñu cha chahá ticahan nuu chi ñu. Vatyí
nyacua nya ñusihí nasama ñu cuhva nyacuví ñu,
vatyí ca iyó ñu chihin tahan síhi ñu, ta ña tahán
chi tyicuan caa.

²⁷ Ta tyicuan caa tucu rayíi, casandihí ra cha ca
iyó ra chihin ñasihí ra, ta quichí cuví iñi ra cacoo
ra chihin tahan yíi ra. Ta canyacuví ra chihin ra
tahan ra, tuhun cha chahá ticahan nuu chi ra. Ta
cha cuenda cuan tachí tuñi Nyoo chi ra ta tiví ra
cha cuenda cha quiñi caa cha canyacuví ra.

²⁸ Ta chaha chá ña cuñí ca ñáyiví nacoto nuu ñu
chi Nyoo, yucuan chaha saña ndaha ra chi ñu na

caca maa xiñi ñu cha quiñi caa, ta sacuvi ñu cha ña tahán chi sacuvi ñu.

²⁹ Vatyí tandihi nuu cha ña vaha sacuví ñu. Iyó ñu chihin inga rayi ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichi cuví xaan iñi ñu coo ca chi ñu. Nyacuví ñu cha quiñi caa. Nyiyó xaan iñi ñu cha chi inga ñáyivi. Chahñí ñu. Iyó ñu tisihi chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñi ñu cuendu.

³⁰ Cahán ña vaha ñu siqui inga ñáyivi. Ta tasi cuñí ñu nyehe ñu chi Nyoo. Tyityi iñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu.

³¹ Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chi cuñí ñu. Ta ña casahá ñu ticahnu iñi chi tahan ñu. Ña ndahvi cuñí ñu nyehe ñu chi tahan ñu.

³² Maa ñu chitó vaha ñu ñáa cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chi tuhun chihi chi ñu ta cuhun ñu anyaya. Soco maa ñu sañihí ca ñu sacuví ñu. Ta nyacua sihi cuñí ñu tatu sacuví inga ñáyivi cha quiñi caa.

2

Tachí tuñi Nyoo chi ñáyivi soco chihin cha ndicha

¹ Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacoun cuatyun. Vatyí suri in ri cha sacuvún chihin ñu nyehún ta cahún.

² Vatyí chító yo vatyí Nyoo tachí tuñi ra chí ñu nyacuví tyehe caa, soco chihin cha ndicha ta chihin cha ndaa, tachí tuñi ra.

³ Ta yoho cha cahán nyaun chí inga ñu, suri ñi ri cha sacuvún chihin ñu. Cutachi tuñi Nyoo chuun cha cahún tyehe caa.

⁴ ¿Ñáá tuhun ña quichahún cha cundahvi cuñí Nyoo nyehé ra chí yo ta cunyeé xaan ra cha sacuví yo? Vaha xaan ñáyiví cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón?

⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chí ñáyiví. Ta cunyehe yo tyi chihin cha ndaa ta chihin cha ndicha tachí tuñi ra chí yo.

⁶ Tatu sacuví yo cha ña vaha, cutahan chí cha ña vaha chí yo. Tatu sacuví yo cha vaha cutahan chí cha vaha chí yo quiví cutachi tuñi ra chí yo.

⁷ Ta cuhva ra ñáyiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chí ñu cha cuenda vatyí sacuví ñu maa maa ri cha vaha chihin cha cama iñi ñu.

⁸ Soco ñihi xaan cutachi tuñi ra chí ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha.

⁹ Cuaha xaan tindocho ta tucuihya iñi cunyehe tandihí ñu casacuví cha ña vaha. Ta cha xihna ri

cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví.

¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sií cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo.

¹² Vatyí tandihí ñu casacuví cuatyí ta ña chitó ñu ley cha chahá Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan.

¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo.

¹⁴ Tatu ñima ñu Israel cuví ñu ta ña chitó ñu ley cuan, soco tuví ñni ñu yoso caa coo ñu; cha tuví ñni ñu chichi añima ñu, ican cuví ley ñu.

¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví ñni ñu tatu vaha o ña vaha cha nyacuví ñu.

¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihí ñáyiví iyó siquí ñuhu ñayiví cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí

yo.

Ñu Israel nyicón ñu ley cha chahq Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chaha Nyoo chí ra Moisés, ra cuví nuu chí ñu Israel quivi cuan. Ta cahnu sahún chuun tyi catyún tyi caá tuhun Nyoo añimon.

¹⁸ Ta chitón cuhva cuñí Nyoo ta ley cuan sañahá chí chuun cha nacachún cha vaha, catyún.

¹⁹ Ta vaha xaan sañahún ityi chí ñu cuaa, cuñí maun. Vaha xaan sacatón ñuhú chí ñu cuahan nu ñaa ñni, cuñí maun.

²⁰ Ta cuñí maun vatyí chitón saquehen ityun chí ñu cha ña chitó. Ta vatyí chitón tandihí cuii ley ta cha ndicha, chitón yoso caa sañahun chí ñu ña chitó, cuñí maun.

²¹ Tatu tyicuan caa yoho sañahún chí inga ñáyivi, ¿ñáá tuhun ña sañahún chí maun? Tatu suri maun catyún vatyí ña tahán chí suhu yo, ¿ñáá tuhun cha tyi maun suhún?

²² Tatu suri maun catyún vatyí ña tahán chí coo inga ñusihi chí noo rayi, o inga rayi chí noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chí xitohyo, ¿ñáá tuhun cha suhún cha tyayi cha iyó nu nyicú chí chichi vehe ñuhu?

²³ Cahnu sahún chuun vatyí chitón ley Nyoo, soco tichan nuu chahún chí Nyoo cha cuenda cha ña sacuvún ley cuan.

24 Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu síqui Nyoo cha catyí nyoho”, catyí chi.

25 Ndicha vatyí cha sacuví ñu tuhun cha tahnya chiin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihi ley cha chaha Nyoo chi ra Moisés ñandihí. Soco tatu ña sacuvún cha catyí ley cuan, tari quivi cha ña sacuvun costumbre circuncisión cuví cuan.

26 Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu.

27 Ra cha ña sacuví costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuví costumbre circuncisión cuvún.

28 Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuví ndo tuhun circuncisión.

29 Vatyí ñáyivi nyaá ley Nyoo aña, ican ñu cuví ñu ñu Israel cha ndicha vaha. Tari quivi tyaa Tatyí li seña cuan aña ñu, ta ñima ñi ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

1 Tatu tyicuan caa, ¿ñáa cha tyinyeé chi yo cha cuví yo ñu Israel? ¿O atu tyinyeé chi chi yo cha

sacuví yo tuhun circuncisión?

² Cuaha cuhva tyinyeé chi. Cha xihna ri, Nyoo chahā ra ley maa ra chi yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuvi ca Nyoo cuhva catyí ra?

⁴ ¡Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasi tandihí ñáyiví cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyiví vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuvi noo cha ndii tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyiví vatyí tyicuan caa tucu maa Nyoo chihin yo, ndii xaan ca natuvi ra tatu yoó ta cunyacuvi ca yo cha quiñi caa. Sacahnú yo chi ra cuví cuan, catyí ñu. Tyicuan ta ña tahán chi tachi tuñi ra chi yo, catyí ñu. Soco tatu tachí tuñi ra chi yo, ña vaha ra vatyí yoó sacahnú yo chi ra, catyí ñu.

⁶ Ña vaha cuhva cahán ñu, vatyí tyehe ta ña vaha Nyoo ma cuvi tachi tuñi ra chi yo. Soco chitó yo tyi tahán chi tachi tuñi ra chi yo cha cuenda cuatyí yo.

⁷ Tatu nyehé yo tyi vaha Nyoo chihin cuatyí sacuví ñáyiví, ¿atu tahán chi tachi tuñi ra chi ñu? Catyí ñu tyi ña tahán chi, soco ña ndicha.

⁸ Tyehe ta ndicha cha cahán ñu cuan, vaha taxin ca sacuvi yo maa maa ri cha quiñi caa

tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yaha sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

¹⁰ Tyicuan caa catyí nu tutu Nyoo, nu catyí chi tyehe caa:

Yori maa ñáyivi vaha iyó, cha ni ña noo maa.

¹¹ Yori ñu cutuñí iñi tuhun Nyoo.

Yori maa nanducú chi Nyoo.

¹² Tandihí ñu sandoo ñu chi Nyoo, ta tandihí ñu ta sacunaq ñu chi ñu.

Yori maa ñu sacuví cha vaha.

Cha ni ña noo maa.

¹³ Tari noo ñaña ndiyí cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴ Maa maa ri ca maa cha quiñi caa cahán ñu.

¹⁵ Vatyí xaan ñu cha cacahñi ñu chi tahan ñu.

¹⁶ Chahá xaan ñu tundoho ta tucuihya iñi chi ñáyivi chihin cuhva iyó ñu.

¹⁷ Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chi ñu noo quivi, catyí chi nu tutu Nyoo.

19 Chitó yo vatyí tandihí cha catyí ley chahnu cha quehen cuenda ra Moisés, catyí chí cha cuenda ñu nyicón ley cuan, tacuhva vatyí ma cuví catyí ñu tyí ñahri cuatyí ñu. Soco coto ñu vatyí cutahan chí cutachi tuñi Nyoo chí ñu vatyí iyó cuatyí ñu. Ta tyicuan caa tucu tandihí ñáyiví iyó siqui ñuhu ñáyiví.

20 Ni minoo ñáyiví ma cuví cuvaha ñu nuu Nyoo cha cuenda tyí sacuví ñu cuhva catyí ley. Soco ley cuan nyaá chí cha cuenda vatyí sacotó chí chí yo tyí iyó cuatyí yo.

Cha cuenda cha chinó iñi yo chí Nyoo ta cuvaha yo nuu ra

21 Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañaha ra chí yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha.

22 Vatyí cha cuenda cha chinó iñi yo chí ra Jesucristo ta cuvaha yo nuu ra, ta sahá ra tuhun tyí ñahri cuatyí yo. Ta ña cachí ra chí yo tatu ñu Israel cuví yo o ñima.

23 Tandihí ri ñáyiví sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaqui Nyoo ma cuví cunyaa chihin ñu.

24 Soco cha cuenda cha vaha ñáyiví cuví Nyoo chihin yo, chahá maa ra cha cuvaha yo nuu ra, ta ña tiin cuenda ca ra cuatyí yo. Vatyí chahnya ra Cristo Jesús cuatyí yo.

25 Nyoo saquichí ra chí ra Cristo vatyí catí niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chí yo tatu chinó iñi

yo chi ra Cristo. Ta cuv̄i chi tyehe caa, tacuhva nyehe ñáyiv̄i tyi Nyoo vaha ra. Ta tyembu chahnu, Nyoo ña tīin cuenda ra cuatyí ñáyiv̄i cha cuenda vatyí cuchaa chi noo quiv̄i cha cuquichi ra Cristo ta sanaa ra cuatyí ñu.

²⁶ Ta tyicuan caa cuv̄i tacuhva vatyí nyehé ñáyiv̄i vatyí Nyoo tyicuan ri vaha ra, ta saha ra tuhun tyi vaha tandih̄i ñu chinó iñi chi ra Jesús.

²⁷ ¿Atu cuv̄i sacahnu yo chi yo vityin? Ma cuv̄i. ¿Ñáá tuhun? Cha cuenda vatyí ma cuv̄i catyí yo vatyí sacuv̄í yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra.

²⁸ Cha chitó vaha yo vityin vatyí Nyoo sacuvaha ra chi yo nuu ra chihin cha chinó iñi yo chi ra, ta ñima chihin cha sacuv̄í yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuv̄i ra? ¿Atu ñima suri ra cuv̄i Nyoo ñu cha ñima ñu Israel cuv̄i? Suri Nyoo tucu ñu cuan cuv̄i chi ra.

³⁰ Vatyí noo tuhun ri maa ra iyó. Ta ican ra sacuvaha ra chi yo nuu ra cha cuenda cha chinó iñi yo chi ra. Cuv̄i ri yo ñu sacuv̄i tuhun circuncisión cuan, o cuv̄i ri yo ñu ña sacuv̄i.

³¹ Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndii maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra?

² Tyehe ta cuvaha ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chí ra, soco ñima nuu Nyoo.

³ Vatyí ¿ñáá catyí nu tutu tuhun Nyoo? Catyí chí vatyí ra Abraham chinó ñi ra chí Nyoo, ta cha cuenda cha chinó ñi ra chí Nyoo, Nyoo saha ra tuhun tyi vaha ra.

⁴ Vaha, vityin cuacuhve noo cuhva chí ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño saha ra, ican cuví.

⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó ñi ra vatyí Nyoo sahá ra tucahnu ñi chí ñu iyó cuatyí, Nyoo cusaha ra tuhun tyi vaha ra cha cuenda cha chinó ñi ra chí ra.

⁶ Ra David cahan ra tuhun tusi ñi cha iyó chí ñáyivi cha saha Nyoo tuhun vatyí vaha ta ña tñin cuenda ra cuatyí cha sacuví ñu.

⁷ Tyehe caa catyí ra David:

Ñáyivi cha saha Nyoo tucahnu ñi cuatyí, si xaan cuñí ñu, vatyí Nyoo ña tñin cuenda ra cuatyí ñu.

⁸ Si xaan cuñí ñu ña tñin cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñi cuví tusi ñi ihya, o cuví tucu chí cha cuenda ñu ña sacuví cuan? Cha yaha sañahi chí

ndo vatyi Nyoo saha ra tuhun tyi vaha ra Abraham cha cuenda cha chinó iñi ra chi ra.

¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuvi ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca.

¹¹ Yaha cuan ta sacuvi ra Abraham tuhun cuan, tari noo seña ri o sellu vatyi Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandihí yo ñu chinó iñi Nyoo vasi ña sacuvi yo tuhun circuncisión. Ta tyicuan caa, Nyoo sahá ra tuhun vatyi vaha yo.

¹² Ndicha vatyi ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuvi ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyi Nyoo catyi ra chi ra Abraham ta chi sehe ra vatyi cuhva ra cha cunyaca ñaha ñu ñuhu ñayivi chihin ra. Soco savaha Nyoo promesa cuan, ñima cha cuenda vatyi ra Abraham sacuvi ra cha catyí ley, soco cha cuenda vatyi chinó iñi ra chi Nyoo, ta Nyoo saha ra tuhun vatyi vaha ra.

¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyí ra tyi cuhva ra chiyó.

¹⁵ Vatyi ley cuan sañahá chi vatyi tahán chi tachi tuñi Nyoo chi yo tatu ña sacuví yo cuhva catyí chi. Soco tyehe ta ñahri ley iyó, ñahri cuatyí yo coo.

16 Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuví chi noo tumañi iñi cha chahá ra chi tandihí yo cha cuví yo ñáyivi chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihí ñáyivi cha chinó iñi chi Nyoo.

17 Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo siqui ñuhu ñáyivi”, catyí ra chi ra Abraham. Ta cha catyí ra tyicuan caa, cuñí chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyi, ta chihin tuhun cahán ra sacoo ra cha cumañi ca coo.

18 Ra Abraham chinó iñi ra chi Nyoo vasi ma cuví ñihi ra promesa cuan tyaa maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaha ñáyivi chuun”, catyí ra chi ra.

19 Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cúvi ra. Tari maa ra ta tari cu Sara ñasihí ra, ma cuví ca coo sehe ñu, tyi cha chahnu xaan ñu.

20 Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ñi iñi ra. Ta yihí ca iñi ra chi Nyoo. Ta sacahnú ra chi ra,

21 cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra

chi ra.

²² Yucuan chaha Nyoo saha ra tuhun tyi vaha ra cha cuenda cha chinó iñi ra chi ra.

²³ Saha Nyoo tuhun vatyi vaha ra Abraham chaha cha chinó iñi ra chi ra. Ña chicunyaꝯ nuu tutu vatyi noo ri ra Abraham cuvaha ra,

²⁴ soco chicunyaꝯ tucu nuu tutu cha cuenda yoó. Vatyi sahá Nyoo tuhun tyi vaha tucu yo vatyi chinó iñi yo chi ra, vatyi ican ra sanandotꝰ chi ra Jesús, Sutu Mañi yo.

²⁵ Ta maa ra chaha cuenda chi ra Jesús tyi cúvi ra cha cuenda cuatyi yo, ta nandotꝰ ra tacuhva vatyi cuvi cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chi yo

¹ Ta cha yaha nduvaha ñima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo.

² Vatyi cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta si cuñi yo, ta yihí vaha iñi yo vatyi cucuhva ra cha cucahnu cuvi yo chihin ra.

³ Ta ñima yucuan ri cusii cuñi yo, tahán tucu chi cusii cuñi yo quivi nyehé yo tindoho. Vatyi chitó yo vatyi cha nyehé yo tindoho cuan cutuhva ca yo coo cha cama iñi yo.

⁴ Ta tatu chihin cha cama iñi yo, yaha yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chi yo.

⁵ Tatu yihí iñi yo chi maa ra, ma cucahan nuu yo nyehé yo chi ra, vatyí cuñí xaan ra chi yo cha cuenda Tatyí li ra cha chahá ra cunyaa añima yo.

⁶ Vatyí quiví cha ña ñihí ca yo yoso caa sacuvi yo chihin cha cuaha cuatyí yo, quiví cuan quichí ra Cristo, quichí cúvi ra cha cuenda yo ñu iyó cuatyí.

⁷ Chitó yo vatyí yori caña iñi cúvi tyiño nuu noo ñáyivi. Vasi xityí ri caña iñi ñu cuhva ñu ñayivi ñu cha cuenda noo ñu vaha xaan.

⁸ Soco yucuan cuví nu sañahá Nyoo vatyí cuñí ra chi yo, vatyí quichí cúvi ra Cristo cha cuenda yo vasi iyó xaan cuatyí yo.

⁹ Ta vityin cha cha yahá cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cuhun ca yo anyaya nu cutachi tuñi Nyoo chí ñáyivi ña chinó iñi chi ra.

¹⁰ Quiví cuan xaan cuví iñi yo chi Nyoo, soco sanicoo vaha ra chi yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihí ra chi yo vatyí iyó ñayivi ra Cristo añima yo vityin cha iyó vaha yo chihin ra.

¹¹ Ta ñima ihya ri, soco cusí tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayí quihvi cuatyí siqui ñuhu ñayivi ta chicoo tuhun chihi. Ta tuhun chihi cuan chicoo chí siqui tandihí ñáyivi vatyí tandihí ñu sacuví ñu cuatyí cha cuenda ra Adán.

¹³ Nyata ni cumañi ca cuhva Nyoo ley chi ra Moisés ta cha iyó cuatyí siqui ñuhu ñayivi, soco ña

t̄in Nyoo cuenda cuatyí ñáyiv̄i ta ni cumañi ca cuhva ra ley cuan.

14 Soco nyacua nya quiv̄i ra Adán ta nyacua nya quiv̄i ra Moisés, chinyaca ñaha tuhun chihi chi ñu cha sacuví cuatyí, vasi ñima tahan cuatyí ra Adán cuví, cha ña quichaha ra chi Nyoo. Ta ra Adán cuví ra tari noo xiñahñu noo ra cha cua quichi.

15 Soco cuatyí ra Adán ña ndiquí tahan chi chihin tumañi ñni cha chaha Nyoo chi yo. Vatyí cha cuenda cuatyí noo rayií cuan, cuaha xaan ñáyiv̄i chih̄i. Soco sacacú Nyoo chi yo cha caha ri, cha cuenda noo ri rayií ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chi cuaha ñáyiv̄i cuví.

16 Cuatyí noo ri rayií ra Adán cuan, ma cuvi ndiquí tahan chi chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chi ñáyiv̄i. Soco vityin chihin cha ñahri tyiyahví yo, Nyoo sacacú ra chi yo ta sahá ra tuhun tyi vaha yo nuu ra, vasi cuaha xaan cuatyí sacuv̄i yo.

17 Ndicha vatyí quichaha nyaca ñaha tuhun chihi siqui ñuhu ñáyiv̄i cha cuenda cuatyí noo ri rayií. Ta cha tyicuan caa chitó yo vatyí cahnu ca cuví cha vaha cha sacuv̄i nonga ra, ra Jesucristo. Vatyí tandih̄i ñu cha ñih̄i cha vaha cha chahá Nyoo, cha cuvaha ñu nuu ra, ta iyó ñu ñáyiv̄i chaa chihin tunyee ñni ra Jesucristo.

18 Tari cha catyí cuatyí ra Adán ta tachí tuñi Nyoo chi tandih̄i ñáyiv̄i iyó siqui ñuhu ñáyiv̄i, tyicuan caa tucu cha cuenda cha vaha cha sacuv̄i ra Jesucristo, Nyoo saha ra tuhun tyi vaha ñáyiv̄i

nuu ra ta chahá ra noo ñayivĩ vaha coo tandihĩ ñu.

¹⁹ O cuñĩ chi catyĩ tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyĩ ñu. Ta suri tyicuan caa tucu cha catyĩ cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyĩ Nyoo chaha cuenda ra ley cuan chi ra Moisés tacuhva nacoto ñáyivĩ tyi iyó cuatyĩ ñu. Ta vasi quetuvĩ xaan cuatyĩ yo cha cuenda ley cuan, soco Nyoo cahnu ca tucahnu iñi iyó chi ra chihin yo vatyĩ cuñĩ xaan ca ra chi yo.

²¹ Tari chinyaca ñaha cuatyĩ chi yo ta chaha chi tuhun chihi chi yo, tyicuan caa tucu nyacá ñaha tumañi iñi Nyoo chi yo vityin ta sacuvaha ra chi yo nuu ra vatyĩ coo yo noo ñayivĩ cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyĩ soco sacuvi yo cuhva catyĩ ra Cristo

¹ ¿Yoso caa catyĩ yo vityin? ¿Atu cusacuvi ca yo cuatyĩ tacuhva vatyĩ sañaha Nyoo vatyĩ cuaha xaan tucahnu iñi iyó chi ra?

² Ma sacuvi ca yo. Yoó cha yaha ndu uvi iñi yo cuatyĩ yo. Tari quivĩ chihĩ cuatyĩ yo cuvĩ cuan. Ta ¿yoso caa cuvĩ sacuvi ca yo vityin? Ma cuvĩ ca.

³ ¿Atu ña chitó nyoho vatyĩ cha ndu ñn ri yo chihin ra Cristo Jesús cha cuenda cha condutya yo? Tari quivĩ chihĩ yo chihin ra cuvĩ cuan.

⁴ Vatyĩ cha cuenda cha condutya yo, tari quivĩ cha quihvĩ yo chichi ñuhú ñn ri chihin ra Cristo quivĩ chihĩ ra cuvĩ cuan. Ta tari nandoto ra Cristo

chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyívi chaa chihin ra.

⁵ Ta ñin ri coño ñuhu nanduví yo chihin ra, tari quívi chíhí yo ñin ri chihin ra cuví cuan, ta cha tyicuan caa, cunandoto tucu yo tari nandoto ra.

⁶ Ta chitó yo vatyí tandíhi cuhva chiyo yo ta ityi chata ca, cha yaha chíhí chi nu cruzi chihin ra Cristo, tacuhva vatyí coño ñuhu cuatyí yo ma cuvi ca cunyaca ñaha chi chi yo.

⁷ Vatyí ñu cha yahá chíhí, ma cuvi ca sacuvi ñu cuatyí.

⁸ Ta tatu cha yahá chíhí yo chihin ra Cristo, chinó ñi yo vatyí cucoo tucu yo chihin ra.

⁹ Ta chitó yo vatyí cha yahá chíhí ra Cristo, noo ri chaha nandoto ra, ta ma cúvi ca ra. Ñahri ca tunyee ñi iyó chí tuhun chihi cha cunyaca ñaha ca chi chi ra.

¹⁰ Yahá cha chíhí ra Cristo cha catyi cuatyí ñáyívi, nandoto ra cha ma cúvi ca maa ra. Ta vityin iyó ra cha cuenda maa Nyoo.

¹¹ Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yahá chíhí yo cha cuenda cuatyí cuan. Soco coo yo cuhva cuñí Nyoo cha cuenda cha ñin ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chi coño ñuhu yo. Ma cuhva yo ityi chi coño ñuhu yo cha saniñi chi chi yo cha sacuví yo noo cha ña vaha cha cuñí chi.

¹³ Ma cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chí Nyoo, tari noo ñáyívi cha chíhí ta nandoto.

Cuhva cuenda yo coño ñuhu yo chi Nyoo tacuhva vatyí sacuvi yo cha vaha.

¹⁴ Vatyí cuatyí yo ma cuvi ca chasaha chi chi yo. Vatyí ley cha tyaa ra Moisés, ña nyacá ñaha ca chi chi yo, soco cha cacu ññima yo ta iyó yo cha cuenda tumañi ññi cha chahá Nyoo chi yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi ññi cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuvi ca yo cuatyí? Ña tahán chi.

¹⁶ Nyoho chitó vaha ndo vatyí tatu cuví ndo musu noo ra, tahán chi sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuvi yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo.

¹⁷ Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyí quichahá ndo chi cuan. Soco vityin chihin cha ññi ññi ndo quichahá ndo tuhun Nyoo cha sañahá ññu chi ndo.

¹⁸ Cha yahá cundaa cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuvi cha vaha.

¹⁹ Cahín noo cuhva cha ña yñi ri chihin ndo vatyí ta cutuñi vaha ca ññi ndo tuhun Nyoo. Quiví cuan chahá cuenda ndo coño ñuhu ndo chi cha quiñi caa ta cha ña vaha vatyí sacuví ndo cha ña vaha. Vityin ñacuhva cuenda ndo coño ñuhu ndo chi

Nyoo tacuhva vatyí coo ndo noo ñáyiví cachi, ta maa maa ri cha vaha sacuvi ndo nuu ra.

²⁰ Quiví cuví ndo musu cha quiñi caa, ña cuví sacuvi ndo cha vaha.

²¹ Soco ¿ñáá cha ñihí ndo chihin cuan? Maa ri ticahan nuu chahá cuan chi ndo. Ta ña tuví ñi ndo. Maa ri tuhun chihi ta anyaya nyisó cuan.

²² Soco vityin ña nyacá ñaha ca cuatyí chi ndo. Ta vityin cha sacuví ndo tyiño nuu Nyoo. Ta ihya ndicha tyinyeé chi chi ndo vatyí chihin ihya cuví coo ndo noo ñáyiví cachi. Ta nu ndihí tuhun tyicuan ri maa cucoo ndo chihin Nyoo.

²³ Cha sacuví yo cuatyí, ican cuan chahá tuhun chihi chi yo. Soco tumañi ñi cha chahá Nyoo chi yo, ican cuan cuví ñáyiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñn ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihí cuenda ra Cristo

¹ Yañi, nyoho ñu chitó ley cuví ndo, chitó ndo vatyí ley nyacá ñaha chi chi noo ñáyiví cha ñi ri ca cha iyó ñu.

²⁻³ Ta cuñun, noo ñaha tandaha, catyí ley vatyí coo ña chihin yñ ña nyacua nya cúvi ra. Ta tatu iyó ña chihin inga rayñi cha ñi ri cha iyó yñ ña, chicoo cuatyí ña nuu Nyoo. Soco tatu cha yahá chihi yñ ña, ña nyacá ñaha ca ley cuenda ñu tandaha chi ña, ta cuví tandaha ña chihin inga ra, ta ma coo cuatyí ña nuu Nyoo.

⁴ Ta tyicuan caa tucu nyoho yañi. Cha chih̄i ndo cha cuenda ley chahnu ta cuv̄i ndo ñu cuenda ra Cristo vatyi ican ra cuv̄i ȳi ndo vityin. Ta ican ra cuv̄i ra cha nandot̄o, tacuhva vatyi cuv̄i cotyiño Nyoo chi yo ta sacuvi yo cha vaha.

⁵ Quīvī chiyo yo cuhva cuñi coño ñuhu yo, ley chahnu cha tyaā ra Moisés, tacuhva sanaquiquī ri chi chi yo cha sacuvi yo cha quiñi caa, vatyi catyī chi tyi ma sacuvi yo. Soco sacuvī yo, ta yucuan cuv̄i cha chah̄a tuhun chihi chi añima yo.

⁶ Soco vityin ña nyacá ñaha ca ley chahnu cuan chi yo, vatyi cha yah̄a chihi cha quiñi caa yo chihin ra Cristo. Ta vityin cuv̄i sacuvi yo tyiño nuu Nyoo vatyi iyó yo ñaȳiv̄i chaa cha chahá Tatyi Ii Nyoo chi yo, ta ña sacuv̄i ca yo tari sacuvī yo quīvī nyicon xaan yo ley chahnu cuan.

Ley Nyoo, ican sañahá vatyi iyó cuatyi yo

⁷ Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuv̄i ley cuan, ma cote ñáá cha cuv̄i cuatyi. Ni ma cote tyi ña vaha cha quichi cuvī iñi cha chii inga ñáȳiv̄i, tyehe ta ña catyī ley cuan vatyi ña vaha.

⁸ Tyehe ta ñahri ley cuan, ma cote ñáá cha cuv̄i cuatyi, ta ma cuñi xain sacuvi, soco quīvī cha chité ñáá cha cuv̄i cuatyi, yucuan quīvī quichī cuvī xaan iñi sacuvi, vatyi naquiquī cha quiñi caa cha iyó chi. Soco tyehe ta ñahri ley, ma coto yo tyi iyó cuatyi.

⁹ Ta quīvī cha ña chité ñáá tuhun cahán ley cha chah̄a Nyoo chi ra Moisés, chicā iñi vatyi ñahri cuatyi iyó nuu Nyoo. Soco quīvī chité ley cuan, ta

chite vatyi tahán chi cunai nuu Nyoo vatyi iyó cuatyí.

¹⁰ Catyí ley cuan tyi tatu quichahí chi chi, cucoi tyicuan ri maa. Soco cha nuu cha ñihi tahvi añime chihin ley cuan, cunaa ndihi nuu Nyoo.

¹¹ Ta cuatyí cha iyó chii, sandaví ñaha chi chii vatyi chotyíño chi ley chahnu cuan tacuhva vatyi tahán chi cunai nuu Nyoo, vatyi ña quichahí nu cahán ley cuan.

¹² Ley cha chahá Nyoo chi ra Moisés, vaha xaan, vatyi tuhun cha chahá maa Nyoo cuví, ta tandíhi cha catyí ra vatyi sacuvi yo, vaha xaan ta cuiti xaan.

¹³ Ta ley vaha cuan, ¿atu ican cuan sativí chii? Ñima. Cuatyí cha sacuví, ican sativí chii, yucuan chaha tahán chi cunai nuu Nyoo. Vatyi ley vaha cuan, ican cuví cha sañahá chii vatyi cuatyí cuví cha sacuví. Ta cha tyicuan caa, sañahá ley vatyi quiñi xaan caa cha sacuví yo cuatyí.

¹⁴ Ta chitó yo vatyi ley cuan, Nyoo chahá. Ta ñahri cuatyí ley cuan. Soco mai iyó cuatyí vatyi sacuví cha quiñi caa ta nyacá ñaha cuatyí cuan chii.

¹⁵ Ña cutuñí iñi ñáa cha tahin. Vatyi cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ican cuan sacuví.

¹⁶ Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyi ley chahnu Nyoo, vaha chi.

¹⁷ Ñima ca mai sacuví cha ña vaha, soco cuatyí cha iyó chii, ican cuan sacuví cha ña vaha.

¹⁸ Vatyi chité vatyi iyó cuatyí cha cuenda coño ñuhi. Yucuan chaha ñahri cha vaha sacuví, vatyi

quichí cuvi iñi sacuvi cha vaha, soco ña cuví.

¹⁹ Cuñí sacuvi cha vaha, soco ña sacuví ta sañihí que sacuvi cha ña vaha.

²⁰ Ta tatu sacuví cha ña cuñí sacuvi, ñima ca mai sacuví, soco cuatyí cha iyó chii, ican cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví.

²² Vatyí chichi añime tahán xaan iñi ley Nyoo.

²³ Soco iyó inga ley chichi coño ñuhi, ta ña tahán iñi chi cuhva cha tahán iñi añime. Ta chahá chi cha cunyaca ñaha cuatyí cha iyó chichi coño ñuhi chii.

²⁴ ¡Ndahvi yuhu ra ndahvi! ¿Yóo ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi?

²⁵ Noo tuhun ri maa Nyoo sacacú ra chii cha cuenda ra Jesucristo. ¡Tyahvi nyoo chi Nyoo cha cuenda cuan! Ta vityin nyehí vatyí chihin añime cuñí sacuví ley Nyoo, soco coño ñuhi cuñí chi sacuví chi ley cuatyí.

8

Tatyí li Nyoo tyinyeé chi chi yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chi ñu ndu ñn ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí li ra.

² Ta tyicuan caa tucu yuhu, Tatyí li Nyoo nyacá ñaha chii vityin vatyí ndachí chi chii, ta chahá chi noo ñayiví chaa coi cha cuenda cha ñn ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chihi chii.

³ Nyoo sacuv_i ra noo cha ña cuv_i sacuv_i ley cha quehen cuenda ra Moisés, vaty_i ña cuv_i chasaha chi coño ñuhu cuaty_i yo cha nyacá ñaha chi yo. Yucuan chaha Nyoo saquich_i ra chi Sehe ra. Quich_i ra chihin noo coño ñuhu tari maa yo, ta chih_i ra cha cuenda cuaty_i yo, ta sandih_i ra tuhun cha nyacá ñaha cuaty_i chi yo.

⁴ Sacuv_i Nyoo tyehe caa tacuhva cuv_i sacuv_i yo cuhva caty_i ley ra, vaty_i ñima ca cuhva cuñ_i coño ñuhu yo iyó yo, soco iyó yo cuhva cuñ_i Taty_i Ii Nyoo.

⁵ Vaty_i ñu iyó cuhva cuñ_i coño ñuhu, cuhva cuñ_i chi chicá xiñi ñu, soco ñu iyó cuhva cuñ_i Taty_i Ii Nyoo, cuhva cuñ_i Taty_i Ii Nyoo chicá xiñi ñu.

⁶ Ta ñu chicá xaan xiñi maa maa ri tuhun cha cuñ_i coño ñuhu ñu, cunaa ñu nuu Nyoo. Soco ñu chicá xiñi cuhva cuñ_i Taty_i Ii. Iyó cha taxi ri aña ñu ta cucoo ñu ñayiv_i tyicuan ri maa chihin Nyoo.

⁷ Ñu cha maa maa ri cuhva cuñ_i coño ñuhu chicá xiñi, ñu xaan iñi chi Nyoo cuv_i ñu, vaty_i ni ña cuñ_i ñu ta ni ña cuv_i sacuv_i ñu cha caty_i ley ra.

⁸ Yucuan chaha ñu iyó cuhva cuñ_i coño ñuhu, ña cuv_i sacuv_i ñu cuhva tahán iñi Nyoo.

⁹ Soco nyoho ña iyó ca ndo cuhva cuñ_i coño ñuhu, vaty_i tatu ndicha cha iyó Taty_i Ii Nyoo aña ndo, iyó ndo chihin cha ñin ri cuv_i ndo chihin Taty_i Ii Nyoo. Ñu cha yori Taty_i Ii ra Cristo ñohó aña, ñima ñu cuenda ra Cristo cuv_i chi ñu.

¹⁰ Soco ñu iyó ra Cristo aña, nyitó aña ñu vaty_i sanduvah_a Nyoo. Soco coño ñuhu ñu chih_i chi cha caty_i cuaty_i.

¹¹ Nyoo sanandot_o ra chi ra Jesús cha yah_a cha chih_i ra. Ta tyicuan caa tucu nyoho, tatu iyó Taty_i

Ii Nyoo añima ndo, cusanandoto tucu Nyoo chi coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo cuhva cuñí coño ñuhu yo.

¹³ Vatyí tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee iñi ra, cuví chasaha ndo chi cha quiñi caa cha cuñí coño ñuhu ndo ta cuconyito ndo cha ndicha cuii.

¹⁴ Vatyí tandihi ñu sacuví cuhva saquehén ityi Tatyí Ii Nyoo, sehe Nyoo cuví chi ñu.

¹⁵ Nya quivi cha tñin cuenda yo Tatyí Ii Nyoo ta ña yuhví ca yo chi ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chi ra.

¹⁶ Ta suri maa Tatyí Ii cuan ndu ñn ri chi chihin cha chiñi tuñi yo ta sacoto chi chí yo vatyí cha cuví yo sehe Nyoo.

¹⁷ Ta cha cuenda cha cuví yo sehe ra, iyó ityi chi yo cha ñihi yo cha vaha cha catyí Nyoo tyi cuhva ra chi yo, ñn ri chihin ra Cristo. Vatyí tatu ñn ri nyehé yo tñdoho chihin ra Cristo, suri ñn ri cucahnu yo chihin ra.

¹⁸ Chité vatyí tñdoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo.

¹⁹ Tandihi cha savaha Nyoo cuñí xaan chi nyehé chi, ta nyatú chi quivi cha cusañaha ra yóo cha cuví tandihi sehe ra.

20 Vatyí tandihí cha savahá Nyoo tiví chi. Vasi ña cuñí chi tiví chi soco Nyoo chahá ra cha tiví chi cha cuenda cuatyi cha sacuvi ñáyivi. Soco catyi Nyoo tyi coo quívi ta cunduchaa tucu chi inga chaha.

21 Tandihí cha savahá Nyoo ta cunduchaa tucu chi inga chaha, ta ma cutívi ca, quívi cha cunasama Nyoo cuhva iyó chi vityin. Ta cucusií cuñí chi ñn ri chihin tandihí sehe Nyoo vatyí ma tiví ca chi.

22 Chitó yo vatyí tandihí cha savahá Nyoo ta nyehé xaan chi tindoho. Cahnu xaan tindoho nyehé chi tari cha uhvi cha nyehé noo ñaha síhi cha cacú sehe ña.

23 Ta ñima maa ri maa chi nyehé tindoho, soco nyehé tucu yoó. Vasi cha natíin cuenda yo Tatyí Ii cha chahá quívi Nyoo chi yo, soco cahnu xaan tindoho nyehé yo, vatyí cuñí xaan yo cha tahán ri chi quívi cha cunanduvi yo sehe ra. Vatyí cunasama ra cuhva iyó coño ñuhu yo.

24 Vasi ta ñihi ca yo tandihí cuan soco chitó yo tyi cuñihi yo vatyí chino ñhi yo ta chihin cuan cacu yo. Tatu nyatú yo cha cutahan chi chi yo, cuñí chi catyi vatyí ta ñihi ca yo. Tatu cha yahá ñihi yo chi chi, ma cuatu ca yo.

25 Soco tatu yíhi ñhi yo cha ñihi yo noo cha ta nyehe ca yo, cuñí chi cha cuatu yo chihin cha cama ñhi yo.

26 Ta suri tyicuan caa tyinyeé tucu Tatyí Ii chi yo chihin cha vita cuñí yo vatyí ña chitó yo yoso caa cacan tahvi yo chi Nyoo cuhva tahán chi. Ta Tatyí Ii cuan chicán tahvi chi chi Nyoo cha cuenda yo chihin noo tuhun cha ña cuví nacatyí yo.

27 Chitó maa Nyoo ñáá cha caá ññima yo, ta chitó ra ñáá cha cuñí Tatyí li ra cacan chí, vatyí chicán chí cuhva cuñí maa ra cha cuenda ñáyívi cuenda ra.

28 Chitó yo vatyí ñáyívi, ñu cuñí vavaha chí Nyoo, tandíhi cha cuví chí ñu ta tyinyeé chí chí ñu, vatyí maa ñu cuví ñu nacachí ra, tari cuhva tyaa ra cuhva chí ñu.

29 Vatyí nya quívi xihna ri, ta cha ñohó nuu Nyoo yóó cuví ñu cucunyicon chí ra. Ta tyaa ra cuhva chí ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñíhi ca cha nuu tandíhi ca yañi ra, ñu yíhí tuhun Nyoo.

30 Ta ñu cha tyaa Nyoo cuhva tyi cuví ñu sehe ra, nacana tucu ra chí ñu. Ta ñu cha nacana ra, suri sacuvaha ra chí ñu nuu ra. Ta ñu cha sacuvaha ra chí, chaha ra cha cucahnu cuví ñu chihin ra.

31 ¿Ñáá cha catyí yo cha tyicuan caa? Tatu Nyoo ta nyaá ra tumañi ññi chí yo, ¿yóó cha cuví tyaa cuatyí síqui yo? Yori.

32 Nyoo ña catyí ra cha ma cuhva cuenda ra sehe ra, soco chaha cuenda ra chí ra vatyí cúvi ra cha cuenda tandíhi yo. Ta tatu tyicuan caa, ¿atu ma cuhva tucu ra tandíhi ca cha chíñuhú chí yo ññi ri chihin Sehe ra? Cuhva ra.

33 ¿Yóó cha cuví tyaa cuatyí síqui ñu cha nacachí Nyoo? Yori. Vatyí Nyoo ícan ra cuví ra saha ra tuhun tyi vaha ñu nuu ra.

34 ¿Yóó cha cuví catyí tyi cuhun yo anyaya? Yori. Vatyí ra Cristo cuví ra chíhi cha cuenda cuatyí yo, ta nandotó ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo.

35 Ñahri cha cuví sacuachiyo chi yo chihin cuhva cuñí xaan ra Cristo chi yo. Vatyí vasi nyehé xaan yo tindocho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihi yo, soco ma cuví sacuachiyo tandihi tindocho cuan chi yo chihin cuhva cuñí ra chi yo.

36 Vatyí tyehe caa cahán chi nu tutu Nyoo tuhun tindocho cha cunyehe yo:

Cha cuendon, Sutu Mañi yuhu, ta cuñí cahñi ñáyivi chi ndi tandihi quívi.

Ta tari noo mbee cha cua cahñi ñu, tyicuan caa sacuví ñu chi ndi, catyí chi.

37 Soco vasi yahá yo tandihi tindocho cuan, soco cucuvi vaha ca chasaha yo cha cuenda ra cha cuñí xaan chi yo.

38 Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihi, ni ñáyivi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusiin chi chi yo chihin Nyoo.

39 Ni cha iyó nu sucun, ni cha iyó nu cono xaan, ni nonga cha savahā Nyoo, ma cuví sacusiin chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

9

Nyoo nacachi ra chi ñu ñuu Israel

¹ Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyí Tatyí Ii Nyoo ican saquehén ityi cha chiñi tuñi xiñi.

Yucuan chaha chitó vahi vatyi cha ndicha cahín nu catyí tyi

² cuihya xaan cuñí ta tyicuan ri uhvi cuñí añime

³ cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa.

⁴ Ta maa ñu, tata ra Israel vachi ñu. Ta Nyoo naquehen cuenda ra chi ñu tari cha sehe ra. Ta sañahá ra cuhva caá ra chi ñu, tyi cahnu xaan ra cuví ra, vatyi chinyaa ra chihin ñu. Ta natyihí tahan ra tuhun chihin ñu, ta chahá ra ley ra chi ra Moisés vatyi cuhva ra chi ñu. Ta sañahá ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi.

⁵ Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuvi chi tyicuan caa!

⁶ ¿Atu catyí vatyi ña sacuvi Nyoo tari cuhva catyí ra chi ñu Israel ta cha naha? Ñima. Soco cuñí chí coto yo tyi ña tandihí ñáyivi Israel cuví ñu ñu Israel cha ndicha.

⁷ Ña tandihí ñu tata ra Abraham ta cuví ñu sehe ra cha ndicha. Vatyi tuhun cha cahán maa Nyoo chihin ra, cahán chi cha cuenda noo ri sehe ra. Vatyi catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.”

⁸ Ihya sañahá chi yo vatyi ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihí ñáyivi chinó iñi tuhun catyí Nyoo tyi cusacuvi ra, ican ñu cuví ñu sehe ra cha ndicha.

⁹ Vatyí cha catyí Nyoo tyi cuhva ra chi ra Abraham, ican cuví ihya: “Quívi cha tahán chi, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰ Ta ñima yucuan ri. Vatyí ní nduvi sehe cu Rebeca, ñn ri sutu ra, sutu chahnu yo, ra Isaac.

¹¹⁻¹² Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuvi Nyoo tyicuan caa vatyí cachí ra chi ñáyivi cha cuñí maa ra, ta ñima cha cuenda cha sacuvi ñu.

¹³ Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴ ¿Tu tyicuan caa ñáa cha cucatyí yo? ¿Atu cuví catyí yo tyi ña vaha cha sacuví Nyoo? ¡Ma cuví!

¹⁵ Vatyí catyí ra chi ra Moisés tyehe caa: “Cu cundahvi cuñi yóo ñáyivi cuñí mai cundahvi cuñi.”

¹⁶ Ta tyicuan caa chitó yo vatyí ma cundahvi cuñi Nyoo nyehe ra chi ñáyivi cha cuenda cuhva cuñí maa ñu, o cha cuenda cha sacuvi ñu. Soco cuhva cuñí maa Nyoo cucuvi. Vatyí maa ra cuví ra cundahvi ñni yóo chi cuñí maa ra.

¹⁷ Vatyí nu tutu ra, catyí ra chi rey Egipto tyehe caa: “Sacuví rey chuun tacuhva sañahí tunyee ñni cha iyó chii chi ndo, ta tandihí ñáyivi cucoto ñu yóo ra cuví yuhu”, catyí Nyoo.

¹⁸ Ta tyicuan caa Nyoo cundahvi cuñí ra yóo ñáyivi cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹ Ta cu catyun chii: “Tatu tyicuan caa, ¿ñáa tuhun cha tyaa Nyoo cuatyí siqui ñáyivi? Vatyí

¿yóo cha cuví nacahnu cuhva cuñí ra? ¡Yori!”

²⁰ Soco ña vaha cuhva chicá iñun cha tyicuan caa. Vatyí yori cuví catyí tyi ña vaha cha sacuví Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisi ñuhú cuan chi ñu cha savahá chi chi vatyí ña tahán iñi chi cuhva cha savahá ñu chi chi? Ma cuví.

²¹ Vatyí ñu cha savahá ndaha tyiño iyó ityí chi ñu savahá maa ñu ñáá cha cuñí ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahvi ri.

²² Tyicuan caa tucu Nyoo, iyó ityí chi ra cha tachi tuñi ra chi ñáyivi quiñi iyó cha cuenda cha sacuví ñu cha ña vaha. Ta cuví sañaha ra chi ñu tyi iyó xaan tunyee iñi chi ra. Soco sanyee xaan ra iñi ra chihin ñáyivi cuan. Ta chi maa ñu tahán chi tachi tuñi ra. Ta tahán chi sanaa ra chi ñu.

²³ Ta iyó tucu ityí chi ra cha sahá ra tucahnu iñi chi ñu savahá maa ra vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihi cha vaha, ta cucoo ñu gloria chihin ra.

²⁴ Ta suri maa yo cuví ñu cuan. Vatyí Nyoo cana ra chi yo. Yihí yo cuví yo ñu Israel, ta yihí yo cha ñima ñu Israel cuví yo.

²⁵ Tari catyí Nyoo nu tutu cha tyaá ra Oseas tyehe caa:

Ñu cha ñima ñu ñui cucatyí yuhu tyi ñáyivi chii
cuví chi ñu.

Ñu cha ña cuñi, cunacuñi chi ñu, catyí Nyoo.

²⁶ Ta suri nu catyí Nyoo chi ñu tyehe caa:
“Nyoho ñima ñáyivi chii cuví ndo.” Ta suri yucuan

cunacatyí tucu ra chi ñu: “Sehe yuhu, ra cuví Nyoo nyíto, cuacuvi ndo.”

²⁷ Soco cha cuenda ñu Israel catyí ra Isaías tyehe caa: “Vasi cuaha xaan ñáyiví ñu Israel tari cha cuaha niyiti iyó yuhu tyañuhu, soco suhva ri ñu cucacu.

²⁸ Vatyí Sutu Mañi yo numi ri cusacuvi ra tandihí cha catyí ra tyi cusacuvi ra siqui ñuhu ñayiví chihin cha cachi.”

²⁹ Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andiví, ta ma sacacu ra chi suhva yo, cunaa tandihí yo,

Tari naq ñáyiví Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáá cha catyí yo? Ñáyiví cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chi ra.

³¹ Ta ñu Israel nyicón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuví.

³² ¿Ñáá tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyí tari cha catyihí chaha ñu chihin noo yuu cuví chi cuan.

³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyaj chi noo ray# cha cuví tari
noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí
Nyoo nu tutu ra.

10

¹ Yañi, cuñi xain chihin cha tandihi añime cha
cacu ñu Israel. Ta cha chican tahvi xain cha
cuenda ñu.

² Cha ndicha cuví vatyí cuñi xaan ñu sacahnú
ñu chi Nyoo, soco ña ñihí ñu cuhva yoso caa tahán
chi sacuví ñu.

³ Vatyí ña chitó ñu yoso caa sacuvahá Nyoo chi
ñáyivi nuu ra. Ta nducú ñu cuhva sacuvaha maa
ñu chi ñu, ta ña nacuhvá cuenda ñu chi ñu chi ra
tacuhva sacuvaha maa ra chi ñu.

⁴ Vatyí ra Cristo cha quichí ra ta sacuví ra
tandihí cha catyí ley, ta sacuví ra vatyí tandihí ñu
chinó iñi chi ra, cuvaha ñu nuu Nyoo.

⁵ Catyí ra Moisés vatyí cuví cuvaha ñáyivi, soco
tatu quichahá ñu cha catyí ley, vatyí catyí ra
tyehe caa: “Ñu cha quichahá tandihí cha catyí ley,
coo ñu noo ñáyivi cha ma naa ca maa.”

⁶ Soco cha cuvaha yo nuu Nyoo cha cuenda cha
chinó iñi yo chi ra Cristo, catyí nuu tutu Nyoo
tyehe caa: “Ma caca xiñun vatyí cuñi chi cha
cundaa noo ra andivi ta cusanoo ra chi ra Cristo
tacuhva sacacu ra chi yo.” Ma caca xiñun tyicuan
caa vatyí cha yahá quichi ra Cristo.

⁷ Ni ma caca xiñun vatyí cuñi chi cha cunoo noo
ra chichi ñuhú vatyí sanandoto ra chi ra Cristo,
vatyí cha yahá nandoto ra.

⁸ Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo.

⁹ Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yaha chihí ra, cucacu añimon.

¹⁰ Vatyí chihin añima yo cuñí chi chino iñi yo chi ra Cristo tacuhva cuvi cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo.

¹¹ Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.”

¹² Vatyí Nyoo in ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihí yo. Ta nasocó xaan ra chi tandihí yo cha chicán tahvi yo chi ra.

¹³ Vatyí tyehe caa catyí tuhun Nyoo: “Tandihí ñu cha chicán tahvi chi ra Jesús cucacu añima ñu.”

¹⁴ Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahan tuhun ra chihin ñu?

¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cahan tuhun vaha nuu ñáyivi.”

¹⁶ Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra

Isaías: “Sutu Mañi yuhu, yori cuñí chino iñi tuhun cahán ndi”, catyi ra.

17 Yucuan chaha cha chiñi xihna yo tuhun ra Cristo, tyicuan ta chino iñi yo chi ra.

18 Soco ndacá tuhin ihya: ¿Atu ña chiñi ñu Israel tuhun Nyoo? ¡Chiñi ñu! Vatyí nu tutu Nyoo catyi chi tyehe caa:

Sutu Mañi yuhu, cha sacoto ñáyivi tuhun maun
ñicahnu siqui ñuhu ñáyivi, catyi chi nu tutu
Nyoo.

19 Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaá ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha
vaha chi noo ityi ñáyivi cha ñima ri tuhun,
ñáyivi cha ña cutuñi iñi.

Ta cunaquiqui tisihi ndo nyehé ndo chi ñu, catyi
Nyoo.

20 Ta ra Isaías caña iñi ra catyi ra tyi ñu cha ña nanducu chi Nyoo, nañihí ñu chi ra. Ta sañahá ra chi ra chi ñu cha ña ndacá tuhun tuhun ra.

21 Ta tyaá tucu ra Isaías tuhun cahán Nyoo chihin ñu Israel tyehe caa: “Ndiyaca cané chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyi Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuñí ca Nyoo chi ñu Israel? Ñima cha ña cuñí ca ra chi ñu, vatyí suri ra Israel cuví tucu

yuhu. Vatyí tata ra Abraham ta tata ra Benjamín cuví.

² Nyata cha naha cachí Nyoo chi ñu Israel tacuhva cuví ñu ñáyiví chí ra. Ta vityin ñima cha sacuahiyó ndihí ra chí ñu, vatyí chító ndo cha catyí nu tutu Nyoo nu chicán tahví ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa:

³ “Sutu Mañi yuhu, chahñi ñu chí ra cuví profeta maun, ta satani ñu arta vehe ñuhu maun. Noo tuhun ri ca mai ndoo, ta cuñí ñu cahñi ndihí ñu chii”, catyí ra.

⁴ Soco nacahan Nyoo ta catyí ra chí ra Elías: “Ñima maa ri maun ndoo. Ucha ca mil ñáyiví naquehen vahi cha ña chicutñi chiti ñu nuu xitohyo nyoo Baal”, catyí Nyoo chí ra.

⁵ Ta suri tyicuan caa vityin, ndoo suhva ñu sacahnú chí Nyoo. Ican ñu nacachí Nyoo chii tyi cusaha ra tucahnu iñi chí ñu.

⁶ Vatyí cha cuenda cha vaha ñáyiví cuví Nyoo ta sahá ra ticahnu iñi chí yo. Tyehe ta chihin cha vaha ñáyiví cuví maa yo ta sahá Nyoo tucahnu iñi chí yo, cuñí chí catyí tyi ñima ca chihin cha vaha maa ra ta sacacú ra chí yo.

⁷ Ta ¿yoso caa? Ñu Israel nanducu xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chii, ñihí ñu cuan cuhva. Ta inga ñu Israel cuan ndundava xaan añima ñu.

⁸ Tari catyí nu tutu Nyoo tyehe caa: “Nyoo chaha ra noo cuhva chí ñu cha ma cutuñi iñi ñu. Ta chaha ra chiti nuu cha ña cutuñi iñi ñu cha nyehe ñu. Ta chaha ra soho ñu soco ña cutuñi iñi

ñu cha chiñi ñu, ta nyacua nya vityin ta tyicuan caa ñu.”

⁹ Ta suri catyi tucu ra David tyehe caa:

Sii xaan cuñi ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichaha ñu Israel cuan nu cahán Nyoo, ta ndoó ri maa ñu cha ma cacu ca añima ñu? Ñima. Vatyí cha cuenda cha ña quichaha ñu chi ra cha saquichi Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñi ñu Israel vatyí nachino iñi inga ñáyivi. Ta cha tyicuan caa ta cuquichi cuví tucu iñi ñu cha cacu añima ñu.

¹² Tatu cha cuenda cha ña quichaha ñáyivi Israel cuhva cha chaha Nyoo chi ñu, cuví chi cha vaha cha cuenda tandihi ca ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quivi cundihvi tucu ñu Israel cuenda Nyoo inga chaha. Yucuan quivi, vaha xaan ta tyaqui xaan cucuvi.

¹³ Ta iyó suhva cha cuñi catyi chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel

cuví. Ta chité vatyí nĩĩ xaan cuví tyiño cha chaha maa Nyoo chii.

¹⁴ Ta cuñí tiqui vatyí cunyehe ñáyiví Israel ñu ñui cuhva chinó iñi ndo chí Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu.

¹⁵ Vatyí cha cuenda cha ña natĩin cuenda Nyoo chí ñu Israel cuví cuvaha inga ñáyiví nuu ra. Vaha xaan cha tyicuan caa ta nyaca cuví quiví cunatĩin cuenda tucu ra inga chaha chí ñu Israel, cucuvi tari cha cunandoto ñu nu chihĩ ñu.

¹⁶ Tatu vaha noo pan cha savahá yo cha xihna ri chihin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chí ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnyá Nyoo chí suhva ñu vatyí ña chingó iñi ñu chí ra. Ta chaha tu olivo cuan natyaá tahan ra soco noo tu olivo huhu. Ta maa ndo cuví tari tu olivo huhu cuan. Ta tari cha natyaá tahan ra chí ndo chaha tu olivo cha xihna ri cuan. Ta tyicuan caa ndu ĩn ri ndo chihin tu olivo Nyoo ta naquehén ndo tandihí cha vaha cha iyó chí ra.

¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnyá Nyoo. Vatyí tatu cuñí maa ndo tyi vaha ca ndo, cuñí chí nichon iñi ndo vatyí ñima maa ndo nyisó ndo chí yoho yutun cuan, soco maa yoho yutun cuan nyisó chí ndo.

¹⁹ O catyí ndo: “Ican, soco chahnyá Nyoo soco

26 Ta cha yaha quihvi inga ñu cuenda Nyoo, tyicuan ta tandihí ñu Israel cucacu añima ñu, vatyí nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra. Ta cusacanyaha ra cuatyí cha iyó chi ñáyivi chi ra Jacob.

27 Ta ihya cuví tuhun cha cunatyihí tahin chihin ñu, quivi na sacuachiye cuatyí ñu, catyí Nyoo nu tutu ra.

28 Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachino iñi ra chi ra quivi cachiyo ra, ta yucuan chaha cachi ra chi ra.

29 Vatyí noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo.

30 Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyí ñu Israel nacahnú ñu nu cahán ra.

31 Nacahnú ñu nu cahán Nyoo vityin tari nacahnú maa ndo quivi cuan. Ta tari cundahví cuñí Nyoo nyehé ra chi ndo vityin, tyicuan caa tucu cucundahvi cuñi ra nyehe ra chi ñu Israel ñandihí.

32 Vatyí Nyoo chaha ra ityi chi tandihí ñáyivi cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chi tandihí yo.

33 ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chiñi tuñi ra!

Ma cuvi nacatyí yo cuhva chicá iñi ra, ni ma chaa yo cutuñi iñi yo cuhva sacuví ra.

³⁴ Vatyí ¿yóó cha cutuñi iñi cuhva chicá xiñi Sutu Mañi yo? ¿O yóó cha sañahá chi ra? Yori.

³⁵ Vatyí yori cha cuví cuhva xihna ca noo cha vaha chi Nyoo ta cha cuenda cuan ta quihí iñi ñu vatyí na cuhva tucu Nyoo chi ñu.

³⁶ Vatyí tandihí maa cha iyó, maa Nyoo savaha, ta chingo chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuvi chi tyicuan caa.

12

Na coo yo noo ñayivi cha sacuvi yo cuhva cuñi Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñi Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví cuhva tiin cuenda ra cha sacahnú yo chi ra.

² Ta ma coo ca yo cuhva iyó ñáyivi iyó siqui ñuhu ñayivi ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñi Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihí cha tahán chi sacuvi yo.

³ Nyoo, cha catyí cha vaha ñáyivi cuví ra, ta tyatyíño ra chii vatyí cuvi apóstol chi ra, yucuan chaha catyí chi tandihí nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva

cha vaha chah̄a Nyoo chi ndo #n ri chihin cha chinó iñi ndo chi ra.

⁴ Vatyí cha noo coño ñuhu, cuaha xaan cuhva iyó chi, ta ña #n ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi.

⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha #n ri cuví yo chihin ra, ta #n ri cuví yo chihin tahan yo. Tari cha noo ri coño ñuhu cuví tandihi ri yo.

⁶ Siin siin tyiño chah̄a Nyoo chi yo, yoso cuhva cha cuñí maa ra cuhva ra chi noo noo yo. Ta cuñí chi cotyiño vaha yo cha vaha cuan. Tatu chah̄a Nyoo cha vaha cha sahá yo profetizar, na chino iñi yo tyi ican cuan chah̄a ra chi yo, ta na naquehen yo tuhun sacoto ra chi yo ta ñacatyí yo chi ñáyivi.

⁷ Tatu chah̄a ra cha vaha cha sacuví yo tyiño nuu inga ñu, cuñí chi sacuví vaha yo. Tatu chah̄a ra cha cuví sañaha yo chi inga ñu, cuñí chi cunyaa yo tyiño cuan.

⁸ Tatu chah̄a ra cha cuví cuhva yo tuhun chi ñáyivi na ndu ñi iñi ñu, cuñí chi cunyaa yo tyiño cuan. Ta ñu cha chah̄a Nyoo xuhun chi, cuñí chi cuhva ñu chihin cha ñi iñi ñu. Tatu chah̄a Nyoo cha saquehen ityun chi ñu yihí cuenda ra, chihin cha ñi iñun sacuvun. Tatu chah̄a Nyoo cha tyinyeé yo chí ñu chiñuhú cha chiñuhú chii, cuñí chi sacuví yo chihin cha si cuñí yo.

Nu catyí ra Pablo yoso caa sacuvi yo cha yihí yo cuenda ra Cristo

ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutyiyahvi chi ñu”, catyí Sutu Mañi yo.

²⁰ Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyí cha sacuvún tyehe caa, sacuvún cha nyacua nducuaaha soho ra chihin tìcahan nuu.”

²¹ Ma cuhvon cha cunyaca ñaha cha ña vaha chuun, soco sanñun ta cuvi chasahun chi cha ña vaha chihin cha sacuvún cha vaha.

13

¹ Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra.

² Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu.

³ Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún.

⁴ Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí

tachí tuñi ra chi ñáyivi cha sacuví cha ña vaha, vatyi tyiño cuan tyaa Nyoo chi ra.

⁵ Yucuan chaha ñiñi cuñi chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyi chitó ndo tyi tyicuan caa tahán chi sacuvi ndo.

⁶ Ta sñn ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyi yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo minoo ñáyivi. Tyiyahvi ndo cha cuenda ñáa cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi.

⁸ Ma coso yica ndo chi ni noo ñáyivi. Soco cuñi ndo chi tahan ndo, vatyi tatu cuñi ndo chi tahan ndo sacuví ndo tandihi cha catyí ley Nyoo cha tyaa ra Moisés vatyi sacuvi yo.

⁹ Catyí ley Nyoo tyehe caa: “Ma coo inga ñusihí o rayí chuun tatu ñima ñasihun o yñun cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chii ñáyivi.” Tatu ndicha cha cuñún chi tahun, tari cha cuñún chi maun, sacuví tucun tandihi ihya ta tandihi ca inga ca ley.

¹⁰ Tatu cuñún chi tahun, ñahri cha ña vaha cua sacuvun chi ñu. Chihin cha cuñi yo chi tahan yo, sacuví yo tandihi cha catyí ley Nyoo cha tyaa ra Moisés.

¹¹ Chihin tuhun ihya saha yo cuenda quiví iyó yo. Vatyí cha chaḡ chí cuhva cha ndoyo yo ta ma cundihñi yo. Vatyí quiví nachino iñi yo chí ra Cristo, naha xaan ca nyaá quichi quiví cucacu ndihí añima yo, soco vityin cha cuyatyin.

¹² Cha cua yaha cha cha cuaa. Ta cha cua cundichin. Yucuan chaha cuñí chí sandihí yo cha sacuvi yo cha sacuví ñu iyó nu ñaa iñi. Ta tahan chí sacuvi yo cuhva sacuví ñáyiví iyó nu ndichin.

¹³ Cachi cuñí chí coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihí o rayii. Ni ma coo viciu chí yo. Ta ma cutasi cuñi yo nyehe yo chí tahan yo. Ta ma nyiyo iñi yo nyehe yo chí ñu.

¹⁴ Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihví noo yo. Ta ma quihí iñi ndo cha sacuvi ndo cuhva cuñí coño ñuhu ndo.

14

Ma cahan nyaun chí tahun

¹ Tatu noo ñáyiví yihí cuenda Nyoo ta chiin ri chinó iñi ñu chí ra, ña vaha cha ma tñin cuenda ndo chí ñu. Vaha natñin cuenda ndo chí ñu soco ma cuvi yuhu ndo chihin ñu siqui tuhun cha chicá uvi iñi ñu.

² Vatyí yihí ñáyiví cuñí maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu.

³ Soco ñu chachí tandihí cuan, tahan chí cha tñin cuenda ñu chí ñu cha chachí yucu ri. Ta ñu chachí

yucu ri, ma cahan nyaa ñu chi inga ñu cuan. Vatyí Nyoo tiiñ cuenda ra chi ñu cuan.

⁴ Vatyí ¿yóó ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñí maa ñu vatyí inuu ri tandihí quivi. Tahan tahan yo cuñí chi coto vaha yo yoso cuhva chicá xiñi yo.

⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo.

⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehén cuenda ra ñima yo. Yucuan chaha tatu iyó yo, o chihí yo soco chi Sutu Mañi yo cuví chi yo.

⁹ Vatyí ra Cristo chihí ra ta nandoto tucu ra vatyí tacuhva cunyaca ñaha ra chi ñu nyitó ta chi

ñu chih̄i.

¹⁰ Soco yoho, ¿ñáá tuhun cha nyehé nyaun chi yañun? ¿O ñáá tuhun cha ña natiín cuendon chi ra? Vatyí tandih̄i yo cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹ Vatyí nu tutu Nyoo catyí chi tyehe caa:
Cha ndicha ndicha cuii vatyí yuhu nyité, catyí
Sutu Mañi yo.

Ta tandih̄i cuii ñáyiv̄i cunacuiñi chiti ñu nui.

Ta tandih̄i ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandih̄i ñáyiv̄i,
catyí Nyoo.

¹² Yucuan chaha noo noo maa yo ta cunacuhva
yo cuenda cha sacuv̄i yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaa yo
chi tahan yo. Soco nducu yo cuhva cha ma
sanacava yo chi ñu nu cuatyí coto sandih̄i ñu
tuhun cha chino iñi ñu.

¹⁴ Yuhu chité vatyí ñahri cha ma cuvi cachi,
vatyí chinó vaha iñi chi Sutu Mañi yo Jesucristo,
ta maa ra sañahá chii. Soco tatu yih̄i ñu chicá xiñi
ñu tyi yih̄i cha ña vaha cachi ñu, cha cuenda maa
ñu, ña vaha.

¹⁵ Soco tatu cha cuenda cha chachún ta quiñi
cuñi yañun, ña ndicha cha cuñún chi ra, ñima ca
cuhva cuñi Nyoo sacuvún. Ma cuhvon cha tiv̄i
noo ñu chihin cha chachún vatyí ra Cristo chih̄i ra
cha cuenda ñu.

¹⁶ Ma cuhva ndo cha cahan ña vaha ñu siqui
noo cha chah̄a Nyoo ityi chuun tyi cachun.

17 Vatyí cha nyacá ñaha Nyoo chi yo cuví chi noo cha cachi coo yo nuu ra. Cusí cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña ñiñi tuhun cha chachi yo o cha chihi yo.

18 Ñu sacuví tyiño nuu ra Cristo tyehe caa, sii cuñí Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

19 Yucuan chaha cuñí chi cha sañihi ca yo cha coo taxi ri yo chihin ñáyivi. Ta tyícuan caa ta cuví tyinyee yo chi noo noo tahan yo na cuahnu yo chihin tuhun Nyoo.

20 Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyí tandihi cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu.

21 Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo.

22 Tatu chinó iñun vatyí cuví cachun tandihi, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sii xaan cuñí yo tatu ña chicá uvi iñi yo noo cha chaha Nyoo ityi chi yo cha sacuví yo.

23 Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihi cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñí chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo.

² Tahan tahan yo cuñí chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo.

³ Vatyí ni ri ra Cristo ña sacuví ra cuhva tahán iñi maa ra, soco cuví chi ra tari catyí nu tutu Nyoo tyehe caa: “Tandihí cha cahán ñáyivi chi Nyoo, chi ra Cristo cahán ñu”, catyí chi.

⁴ Vatyí tandihí cha chicunyaá nu tutu Nyoo ta ityi chata ca, chicunyaá chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñí añima yo cha cuenda cha sacuahá yo nu tutu Nyoo.

⁵ Ta Nyoo ican ra chahá cha cama iñi yo, ta chahá ra cha vaha cuñí añima yo. Na tyinyee ca ra chi yo cha coo yo chihin cha ñn ri cuví yo chihin tahan yo tari cuhva iyó ra Cristo Jesús.

⁶ Vatyí tacuhva tandihí yo ñn ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

Ñáyivi ñima ñu Israel cuví, cucuñi ñu tuhun Nyoo

⁷ Yucuan chaha tñn cuenda vaha yo chi tahan yo tacuhva vatyí sacahnu yo chi Nyoo tari tñn cuenda vaha ra Cristo chi maa yo cha cuenda vatyí sacahnú ra chi Nyoo.

⁸ Vatyí catyí yuhu chi ndo vatyí ra Cristo quichi tyinyee ra chi yo cha cuví yo ñu Israel, tacuhva

sacuvi ra cha catyí Nyoo chi sutu chahnu yo tyi cusacuvi ra. Ta tyícuan caa ta sañaha ra Cristo vatyí Nyoo sacuví ra cha catyí ra tyi sacuvi ra.

⁹ Ta quichí tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahvi cuñí ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihí ityi ñu iyó siqui ñuhu ñayiví.

Ta cucate yaa cha cuenda cha sacahní chuun nuu ñu, catyí chi.

¹⁰ Ta inga tucu nu catyí chi nu tutu Nyoo tyehe caa:

Cusí cuñi nyoho ñu cha ñima ñu Israel cuví.

Cusí cuñi ndo chihin ñu Israel cha cuví ñu ñáyiví cuenda Nyoo.

¹¹ Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuví.

Tandihí ñáyiví sacahnú ñu chi ra cha cuenda cha cahnu xaan cuví maa ra.

¹² Tyaq tucu ra Isaías nu tutu Nyoo tyehe caa:

Cucacu minoo ra vachi tata ra Isaí.

Cuquichi ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí ñi ñu chi ra vatyí cusacacu ra chi ñu.

¹³ Nyoo ican ra chahá tunyee ñi chi yo ta chitó yo tyi cuhva ra cha cuhva ra chi yo. ¡Na sacutu ra chi ndo chihin tusí ñi! Ta coo cha taxi ri cuñí aña ndo cha cuenda cha chinó ñi ndo chi ra, tacuhva vatyí chihin tunyee ñi Tatyí li ra ta quihí vaha ñi ndo cha cucuhva ra chi ndo.

14 Yañi luhli, chitó vahi vatyi nyoho vaha xaan ñáyivi cuví ndo ta chitó ndo tandihi, ta chitó vaha ndo cuhva ndo tuhun chi tahan ndo.

15 Soco nu carta ihya ñihi xaan cahín siqui tandihi tuhun cha tyaj, tacuhva cha ma naa iñi ndo. Tyehe caa sacuví cha cuenda tyi Nyoo chaha ra tumañi iñi chii

16 cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra ñima ñáyivi. Tyehe caa sacuví tacuhva vatyi ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyi cha ndundü ñu nuu ra cha cuenda Tatyí li ra.

17 Cha cuenda cha nacuhva cuende chii chi ra Cristo Jesús, yucuan cuenda cuví cusii cuñi ta chité tyi vaha quitá tyiño sacuví nuu Nyoo.

18 Vatyi ña cañá iñi cahin cha ña nyehi. Soco nacatyí cha sacuví ra Cristo nu chicá noi cahín tuhun Nyoo tacuhva vatyi ñu cha ñima ñu Israel cuví quichaha ñu chi Nyoo. Ta ihya ndicha cha cahín.

19 Vatyi chihin seña ta milagru ta chihin tunyee iñi Tatyí li ra sacuví ra. Ta tyicuan caa cahín tuhun cha cacu ñima ñu sahá ra. Quichahí nya Jerusalén ta tandihi ityi ta nyacua nya Ilírico.

20 Ta tyicuan caa saniñi cahin tuhun cha cacu ñima yo maa maa ri nu ta cuiñi ca maa ñáyivi tuhun ra Cristo, tacuhva vatyi ma saha tyiñe nu quichaha saha tyiño inga ra.

21 Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvi maa tuhun cha cuhin cunyehe nu nyicú ndo, vaši cuaha xaan chaha cuñi cuhin.

²³ Soco vityin cha ndihi tyiño sahi ityi ñuu ihya. Ta cha cuaha xaan cuiya cuñi cuhin cunyehe nu nyicú ndo ta cunyai suhva quivi chihin ndo.

²⁴ Nyehe tatu cuhin cunyehe nu nyicú ndo quivi cuhin España. Ta cha yaha cha cunyehe chi ndo, nyehi tatu cuvi tyinyee ndo chii ta cuchaa ndihi nu cuahin.

²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan.

²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén.

²⁷ Tyehe caa quichi cuvi iñi ñu sacuvi ñu. Ta ndicha vatyí tahán chi sacuvi ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo.

²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu ñin ri ndo chihin, chihin t̄ndoho cha nyehí, ta çacan tahvi ndo chi Nyoo cha cuende vatyí cuñí ndo chi Sutu Mañi yo Jesucristo, ta vatyí chahá Tatyí Ii Nyoo cha cuñí ndo chii.

³¹ Çacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na nat̄in cuenda vaha ñu.

³² Vatyí tatu Nyoo ta cuñí ra, chihin cha s̄i cuñi quichi nyehi chi ndo ta cuví nyitati ñin ri chihin ndo.

³³ Ta Nyoo ra chahá cha taxi ri coo aña yoo, na cunyaa ra chihin tandihí ndo. Ta naçuví tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyée xaan ña chi ñu yihí cuenda Nyoo ñuu Cencrea.

² T̄in cuenda vaha ndo chi ña tari t̄in cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihí cha chiñuhu chi ña, vatyí cuaha xaan ñu tyinyeé ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñayiví ñu quiví cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco

tandihí tucu ñu cha ñima ñu Israel cuvi, ta yihí tucu ñu cuenda Nyoo.

⁵ Cuhva tucu ndo nocumi chi ñu yihí cuenda Nyoo cha candú ñn ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya.

⁶ Cuhva ndo nocumi chi cu María. Sahá tyiño xaan ña nu nyicú ndo.

⁷ Cuhva ndo nocumi chi ñu ñui, ra Andrónico ta ra Junias, ra tahin cha ñoho chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo.

⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí.

¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí.

¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo.

¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo.

¹³ Cuhva ndo nocumi chi ra Rufo, noo ra cahnu cuví ra nuu Nyoo vatyi chinó vaha iñi ra chi Sutu Mañi yo. Ta vachi tucu noo cumi chi sihi ra Rufo.

Cuví ña tari sihi.

¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra.

¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihí ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chí ñu cuñí sasín chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan.

¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu.

¹⁹ Tandihí ñáyivi chitó yoso caa quichahá vaha ndo chí Nyoo. Yucuan chaha cusí xaan cuñí chihin ndo, ta cuñí vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha.

²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chí ra ña vaha, ta cuhva ra cha cuañi ndo síqui ra. Na nasoco Sutu Mañi yo Jesucristo chí ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chí ndo. Ta tyicuan caa tucu ra Lucio, ta ra Jasón, ta ra

Sosípater, tandihí ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñin ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihí ñu yihí cuenda Nyoo. Ra Erasto ra cuví tesoreru ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuvi chi tyicuan caa.

Nu ndihí cahán ra Pablo ta sacahnú ra chi Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cuní ñi ndo, ta ma sandihí ndo cha chinó ñi ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. ñin ri cuví chi chihin tuhun cha ñohó xehe ta cha naha nyata ni cumañi chinó ñuhu ñayiví.

²⁶ Soco vityin sañahá Nyoo chi yo cha cuenda tutu cha casandoq ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahán chi coto tandihí ñayiví tacuhva chino ñi ñu chi ra ta quichaha ñu tuhun cahán ra.

²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuvi chi tyicuan caa.

Tuhun cha sañahá ra Jesucristo chi yo
New Testament in Mixtec, Jamiltepec
(MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Mar 2026 from source
files dated 29 Jan 2022
7411d349-0f34-5963-987e-74457a7bad38